

26. maj 2015

Inatsisartut suleriaasianni § 37 naapertorlugu matumuuna Naalakkersuisunut apeqqutit imaattut saqqummiuppakka:

**1. Aalisakkat atorneqanngitsut atorluarneqarnissaat, kiisalu tunisassiat naleqarnerulersinneqarnissaat pillugit Naalakkersuisut pilersaaruteqarpat?**

(Inatsisartuni ilaasortaq Nikolaj Jeremiassen, Siumut)

**Tunngavilersuut:**

Ukioq kingulleq 2014-mi qineqqusaarnermi inuussutissarsiutit pingaarnersaat tupinnanngitsumik annertooujussuarmik sammivarput, eqqartuisarnermi pineqarlutik aalisakkat atorneqanngitsut atorluarneqarnissaat, kiisalu naleqarnerulersinneqarnissaat.

Ukiup nikinnerani raajartassanik appaavugut, taamatuttaaq ukiormanna sikuunerata kingunerisaanik pissuteqarluni ilimagivara raajarniat tutsiussuutilissasut pisassaminnik nunguutsillutik, apeqqutigerusunnarporlu ukiup naanissaata tungaanut allamik periarfissinneqarniarnersut, kiisalu aalisakkat imartatsinni tunisassiaralugit niiverutigineqartut ikittuinnaanerat pissutigalugu atunngisatta atorneqalernissaat anguniagassat pingaartut ilaattut taakkartorpavut.

Paasiuminaattut ilaattut tikkuarusuppara inuiaqatigiit pigisaanni Royal Greenlandimi qeeqqat / kigutillit 4 kg-mik oqimaannerusut tuneqqusaannginnerat, taassumallu kingunerissavaa pisanik eqqaaneq, pissutigalugu: angisuut amerlanermik pisaasarmata.

Apeqqutima ullut suliffiusut qulit iluanni akineqareersimanissaa kissaatingaara.